

Dibsho ni Inpaspasing nonta ira Apostol (ACTS)

Lessons Para iren Anak

LESSON 8

Bible Story: **Kineskespigan sha si Esteban**

Scripture: Acts 6:8-7:60,

Objective: - Asen ni anak jey no mepedigat iray emati, ketodongi ira ni Ispirito Santo, say ontoled Tan itoloy shen mansilbi son Apo Shiyos.
- Amtaen ni anak ey, sota ira emati ja manda-kam ni digat kabol ni sha kepansilbi son Jesus wara i evaten shen konkona.

Review Questions:

1. Shi kepanshekel ira ni emati shi Jerusalem nganto sota nanbalin na problima sha? (Kowan ira nonta Grecian na Hodiyo ey nay-olay ira sota ebalo son si-khara)
2. Nganto sota inkowan ira nonta apostol ja dag-en ira nonta emati? (Memidi ira ni seven ja dakili)
3. Nganto koma bengat i dag-en ira nonta apostol? (Mankararag tan mengitosho ni Esel Apo Shiyos)
4. Nganto sota kasapolan na wara ira so nonta ja dalekin pidi-en sha? (Kasapolan na inshalan ni Ispirito Santo tan wara i amta to)
5. Sipa ira sota epilin seven ja daleki? (Stephen, Philip, Procurus, Nicanor, Timon, Parmenas, and Nicolas)
6. Ebadeg ngata i intolong nonta inpamidira ni piton daleki shi obda nen Apo Shiyos? (Owen! Nayvaras i Esel nen Apo Shiyos shi kedogadogad tan eshakil iray toton emati son Apo Jesus)

A. Introduction

Pineshasan jon na-tongan ni apoy? Ngantoy nem ngaaw jon ipalaw i takday jo nodta manshedang nga apoy? Kaikowan nen tatang tan nanang tayo ey ma-tongan kito no i esop tayo i takday tayo shi apoy. Jet say eg kito ma-tongan ngantoy pesing tayo? Kasapolan na man-anad kito, eg kito man-ay-ayam ni apoy, ta no ma-tongan kito insakit ta pasiya.

Mabedin tayo jen iwasan na mesekitan tan mandigat no ipakat tayo i kabaalan tayo, nem amtayo say digat ono paras eg mabedin na maiwasan ja mepasamak so ni sakeyya emati.

B. Inshalan ni Ispirito Santo si Esteba

Basaen tayoy Acts 6:8-10

Niman na agsapa, wara i sakey ya toon eg to ngay inpalobos ja sota sha kepemedi-digat son si-khato i tiped ja eg to ibingay i Esel nen Apo Shiyos so ni totoo ja eg emati son Jesus, ja Anak nen Apo Shiyos. No diket etoled si-khato ja mengitostoshod eshom.

Sipa kari ira sota pito'n daleki jen epili ja ontolong nga mansilbi ira soni ematid Jerusalem? (Esteban, Philip Procurus, Nicanor, Timon, Parmenas, and Nicolas). Si Esteban na sakeyya epili inkowan tod ja Biblia ey inshalan ni Ispirito Santo. Shiya debsho ni Acts nganto i piyan na aseden ni inshalan ni Ispirito Santo i sakey ya emati? Sota sakeyya toon inshalan ni Ispirito Santo, si Apo Shiyos i amengitoshay son si-khato. Si Apo Shiyos i amengikan ni daing to tan ni kedsang to. Si Esteban, eshakil i dingdingkhaton kaskasshaaw ta wares Apo Shiyos son si-khato ja engikan ni panakabalin to.

Etoled ja mengikokowan ni Esel Apo Shiyos so nonta ira mankontra son si-khato ja Hodiyo tan angken pay ira so nonta pangolo ni religion ono papashi.

C. Nandagbo ira sota Hodiyo ni mengikowan ni aliwen podno mangpangkep son Esteban.

Basaen tayoy Acts 6:11-15

Inas-ashal tayola ey si Satanas kabakal to si Apo Shiyos. Kaipakat nen Satanas i kabaalan to say pesalsheng toy obda nen Apo Shiyos. Agsipod ta pan-osala nen Apo Shiyos si Estedan say ipa-sas to so ni totoo i panakabalin Apo Shiyos, wara iray makaontra son si-khato. Sota ira makaontra son Apo Jesus inshogira ja contraen sota toro nen Esteban. No waray ikowan nen Esteban son si-khara ket sha kepansongbati nem eg sha maebak si Esteban tep inpalobos ton sota Ispirito nen Apo Shiyos i mengiredan son si-khato. Si Apo Shiyos engikan ni daing ton onsangbat ira so nonta mankontra son si-khato. Eg mabedin na dag-en Esteban ira iyay obda nen Apo Shiyos, no ayshi si Apo Shiyos so nen si-khato.

Agsipod ta eg sha maebak si Esteban, pinelano shen sheshalen si Esteban. Nandagbo ira ni toon mengikowan ni aliwen podno maypangkep son Esteban. Inges niyay met lang i dingka ira nonta makontra so nen Apo Jesus nonta shanshani ja inkoros sha indagdag-an sha ni oowap ja kowan sha i basol To. Jet niman waray dinagboan ira nonta makaasneng nonta pan-itoro nen Esteban maypangkep so nen Jesus ja mengikowan ni peneshal sha son si-khato.

Siguro ninemnem nen Esteban sota dinak-kanam nen Jesus ja Mengisedan, ja engikan ni kedsangan to shi sha kepengikokowan ni oowap maypangkep son si-khato.

Inkowan ira nonta toon jen dinagbowan sha ey, “Intenengan mi i inkowan nen Esteban jet imaykontra i toka ikokowan shi dinteg nen Moses, tan emaykontra pay so nen Apo Shiyos!”

Shi sajayya inkowan shen oowap maypangkep son Esteban. Sota ira karakdan na totoo tan sota ira pangolo ni Hodiyo tan mamaistoro ni dinteg, bimanonget ira son Esteban, jet singkel sha et indaw sha nodta ira toray ni Hodiyo.

Nem idi wara si-khato nodta sangoan ira nonta pangolo ni relijon inon-an shay dopa to ja singa dopa ni anghil.

D. Inkokowan nen Esteban i dingdingka ira nonta ap-apo sha, so nonta ira nansilbi son Apo Shiyos.

Basaen tayoy eshom ma verse Acts 7:1-4, 51-53.

Sota engaton pari inbag-an to si Esteban no agpaso sota inkokowan sha son si-khato. Nem sinongbatan si-khato nen Esteban babaen nonta inpangikokowan to nonta inpan-obda nen Apo Shiyos so nonta ira totoo to tan sota inpamedaw ira nonta Hodiyo so nonta ira nansilbi son Apo Shiyos. Inshogi to so nen Abraham, nonta inejaban nen Apo Shiyos ja ondaw shi Haran. Inkowan pay nen Esteban no kas-ano ja inokes ono binedaw ira nonta aaki nen Jose si Jose ja agi ra. Inepalan sha et indahora shi Egypt et nanbalin na baga-en. Nem inosal nen Apo Shiyos si Jose shi Egypt say isalakan to ira sota aaki to shi bitil tan shi digat. Intoloy nen Esteban ja nan-storiya, inistoriya to maypangkep son Moses, no kas-ano ja inosal nen Apo Shiyos si-khaton engibodos ira nonta i Israel shi pagkabagaen shed Egypt ingkaton nimotok ira nodta dagad ja inkari nen Apo Shiyos son Abraham. Inkowan to pay sota eg inpati nonta ira totoo si Moses, ja kowan sha ey mayat no may-odi ira shi Egypt. Jet intoled to pay jen inkowan so ira nonta esa-nop pa toray ni Hodiyo ey, “Epalado kayo, etangken i toktok jo! Enasneng jon itenengan i bilin nen Apo Shiyos! Nay-inges kayo met laeng so ira nonta appoyo la, ja eg jo kosto ni olay ja ishalan shakejo ni Ispirito Santo! Sipay amtayo ja para padto nen Apo Shiyos nonta bayag da ja eg pinedigat ni appoyo? Binonoren emin ira sota engipadto nonta bayag da ey waray ibetkag ali nen Apo Shiyos jamengisedakan! Jet idi nay-agpayso sota padto ni indaw ali nen Cristo, Si-khato sota inpaskel jo jet inpabonoyo, ey enshiy basol To. Si-khayo i engawat nonta bilin nen Apo Shiyos ja in-awat ni anghil so nen Moses, nem eg jo pinati!”

Etoled si Esteban ja engikowan ira so niyay ya kinapodno nodta totoo jen makakontra son Apo Jesus. Apay ngata? Owen tep ebadeg pamati to tan inshalan ni Ispirito Santo nen Apo Shiyos.

Piyan nen Apo Shiyos ja sajay iren totoo amta-en sha i kinapodno et bigbigen sha i nanbasol ira et memati ira son Apo Jesus ja Mengisedakan say pakawanan ira nen Apo Shiyos i basbasol sha. No say sakey ya too ket amta-en toy kinapodnon si Apo Jesus, Si-khato sota inkari nen Apo Shiyos ja Mengisedakan, Si-khato sota etey kabol ni basol ni totoo, sotan may timpon pemegbig to jen si Jesus i Mengisedakan to. Jet kostoan si-khato nen Apo Shiyos, eg meshosa. Nem no eg sha patien ja inges to ira ja pangolo ni relijon ja ingetneng ni inkowan nen Esteban ey nanbasol ira tep si-khara i nanbono son Apo Jesus eg ira nanbabawi nodiket bemonget ira son si-khato. Eg ira kostoan nen Apo Shiyos et meshosa ira

E. Kinespigan sha si Esteban ingkaton etey.

Basaen tayoy verses 56-60

Idi inkowan nen Esteban son si-khara ey “Tangkak kayo! Inon-an kon edo-katan i dangit, jet sota kowan sha ey Anak ni Too, dimayat shi apit ni kanawan nen Apo Shiyos!” Nem sota ira toray ni Hodiyo, inopop sha et i tangidara, ja ireka mankeljaw, jet bintik shen shagos si Esteban. Inbo-day sha nodta ili jet nan-a-atangan shen kineskispigan ni bato. Jet sota ira engespig, insepara sota ta-kep ni baro sha shi sango-an nen Saul, ja kowan sha ey bantayan to. Nonta marama ja sha kepankespigi ni bato si Esteban, nansawat, ja kowan to ey, “Apo Jesus, awat mo ngo iya biyag ko.” Nantalimokod jet inkedsang toy shawat to ja kowan to ey, “Apo, pakawanim ira jay ya totoo ni sajay ya dingkara so’n si-kak.” Sajay i shawat to asan matey mala.

Agsipod ta inshalan ni Ispirito Santo si Esteban binaalan ton inenosan sota digat to. Jet inkararagan to et ira ey pakawanan ira nen Apo Shiyos. Inges niyay met lang i kararag nen Apo Jesus nonta emandikat shi koros. Inkowan to shi Lukas 23:34 Kowan nen Jesus son Apo Shiyos ey, “Ama, pakawanim ira ja nandaga niya ngaaw son si-khak, ta eg sha amtay shaka pandag-a.”

F. Conclusion:

Eg tayo mebedin na deg-en i obda nen Apo Shiyos no eg kito manpaosal ni Ispirito Santo. Ipalobos tayo sota Ispirito Santo i mengiredan son si-khatejo ja osalen To i bongot tayo’n mengikowan ni Esel Apo Shiyos shi eshom, sota tangida tayo ja mantetneng ni Esel To, tan sota biyag tayo ja osalen to shi piyan To.

Shi pan-ashal tayo niya disho ni Acts eshakil i dinakda-kaman ira ni emati ja digat inbalod sha ira, binidin sha ira ey eg sha itoro i maypangkep son Jesus tan binonora ira. Si Esteban kinespigan sha ingkato ja etey nem aliwen aabos to nonta emanda-kam ni digat, inon-an to si Apo Jesus shi dangit ja emansesked son si-khato. Ayshila si-khato shiya dobong nem niman emekibibiyag son Apo Jesus shi dangit ni ingkhatod ingkha. Sajay i mengi-kan ni kedsangan tayo ja emati angken eshakil i digat tayo manpatoloy kito ta wara si Apo Jesus ja manbanbantay son si-khatejo.

Memory Verse:

Luke 6:22 “Blessed are you when men hate you, when they exclude you and insult you and reject your name as evil, because the Son of Man.”